



Sesida dals

28 d'avrigl 2015

Communitgà ils

1. da matg 2015

Protocol nr.

363

Incumbensa Caduff

concernent il sustegn per personas che assistan e tgiran lur confamigliars

Resposta da la regenza

Il rapport dal cussegl federal "Sustegn per personas che assistan e tgiran lur confamigliars" ch'è cumparì ils 5 da december 2014 (<http://www.bag.admin.ch>) cuntegna in'analisa da la situaziun sin plaun naziunal e mussa il basegn d'agir per la Svizra. Sa basond sin il basegn d'agir ch'è vegnì constatà cuntegna il rapport in plan d'acziun per sustegnair e distgargiar las personas che assistan e tgiran lur confamigliars. La finamira dal plan d'acziun è quella da crear bunas cundiziuns generalas per personas che assistan e tgiran lur confamigliars. Correspudentamain na cumpiglia il plan d'acziun da la confederaziun betg mo las mesiras ch'èn en la cumpetenza da la confederaziun, mabain tut las mesiras ch'èn raschunaivlas ord vista da la confederaziun, pia er mesiras che pon vegnir realisadas mo ensemen cun ils chantuns, cun las vischnancas e cun organisaziuns privatas u schizunt mesiras che questas instituziuns pon mo realisar sezzas.

Concretamain prevesa il plan d'acziun dal cussegl federal las suandantas mesiras:

- metter a disposiziun infurmaziuns generalas e praticas
- sensibilisar las interpresas
- meglierar las basas da datas
- engrondir las enconuschientschas che sa basan sin la savida
- sviluppar standards da qualitat per la tgira a chasa sco er per purschidas da distgargia
- examinar pussaivladads finanzialas da distgargia per purschidas da distgargia che chaschunan gronds custs
- examinar ina meglieraziun da la segirezza giuridica en cas d'absenzas curtas da la piazza da lavur
- examinar l'extensiun da las bunificaziuns da tgira da la AVS
- relaschar ina basa legala per in congedi d'assistenza – cun u senza ch'il salari vegnia pajà vinavant – u pussaivladads da sustegn alternativas per absenzas pli lungas che vegnan chaschunadas da la tgira
- examinar pussaivladads per garantir la protecziun cunter la desditga durant il congedi d'assistenza

La finamira dal plan d'acziun chantunal che vegn intenziunà cun l'incumbensa qua avant maun è quella da crear bunas cundiziuns generalas per personas che assistan e tgiran lur confamigliars. Il plan d'acziun chantunal cuntegness pia praticamain las medemas mesiras sco il plan d'acziun da la confederaziun.

La brochura d'infurmaziun "Persunas che tgiran lur confamigliars en il Grischun", ch'è vegnida elavurada dal DGSS, mussa l'importanza da las persunas che tgiran lur confamigliars per ils fatgs da sanadad dal Grischun ed appreziescha lur prestaziuns e lur contribuziun a favur dal provediment da la sanadad dal chantun. Ella dat infurmaziuns a las persunas che tgiran lur confamigliars davart las purschidas che las pudessan distgargiar tar la tgira e l'assistenza da lur confamigliars. En la terza part da la brochura d'infurmaziun vegnan mussadas las activitads che la confederaziun ed il chantun han instradà u realiseschan il proxim temp per sustegnair las persunas che tgiran lur confamigliars.

Tenor la brochura d'infurmaziun ha il chantun Grischun prendì las suandantas mesiras da ses champ da cumpetenzza per sustegnair e distgargiar las persunas che tgiran lur confamigliars:

- autorisaziun dals servetschs da la spitex per engaschar persunas che tgiran lur confamigliars
- concessiun d'ina incarica da prestaziun a la Crusch cotschna dal Grischun per manar in post d'infurmaziun e da cussegliaziun per persunas che tgiran lur confamigliars
- concessiun d'ina incarica da prestaziun a la secziun grischuna da l'associaziun svizra d'Alzheimer per sustegnair persunas dementas ed ils confamigliars che las tgiran
- concessiun d'ina incarica da prestaziun a l'uniun "palliative gr" per sustegnair las persunas che tgiran confamigliars en situaziuns da tgira palliativa
- installaziun dal portal d'infurmaziun "Mussavia per la vegliadetgna Grischun"
- instituzionalisaziun dal forum grischun per dumondas da la vegliadetgna
- appreziaziun da la lavur da las persunas che tgiran lur confamigliars cun publictar ina brochura d'infurmaziun correspudenta
- instituzionalisaziun da scuntradas periodicas cun il cussegl grischun da las persunas attempadas

Sco ulteriura mesira examinescha il chantun da dar impuls per metter a disposiziun letgs da vacanzas en las chasas da persunas attempadas e da tgira.

Ord vista da la regenza fai pauc senn, sch'il chantun fa – sco pretendì en l'incumbensa, per cumplettrar las mesiras ch'el ha instradà e planisà – in plan d'acziun chantunal cun praticamain las medemas finamiras sco il plan d'acziun da la confederaziun, tant pli perquai ch'il chantun è cumpetent mo per la realisaziun d'ina pitschna part dals secturs tematisads en l'incumbensa. Per quest motiv, e renviond al catalog complessiv da las mesiras gia instradadas dal chantun, propona la regenza al cussegl grond da refusar l'incumbensa qua avant maun, tant pli perquai ch'ella na mussa naginas ulteriuras mesiras che stuessan vegnir prendidas concretamain.



En num da la regenza

Il president:

Martin Jäger

Il chancelier:

dr. C. Riesen